

## প্রেস রিলিজ

গত ১৮.০৫.২০১৬ তারিখ সকাল ১১.০০ ঘটিকায় কৃষি বিপণন অধিদপ্তরের মহাপরিচালক জনাব মোঃ মাহবুব আহমেদ এর সভাপতিত্বে “পবিত্র রমজান উপলক্ষ্যে নিত্য প্রয়োজনীয় পণ্যের সরবরাহ/মূল্য সহনীয় ও স্থিতিশীল রাখার বিষয়ে এক মতবিনিময় সভা” অনুষ্ঠিত হয়। উক্ত সভায় ঢাকা মহানগরীর বিভিন্ন পাইকারী ও খুচরা বাজারের সভাপতি/সাধারণ সম্পাদক/ব্যবসায়ী প্রতিনিধিবৃন্দসহ অধিদপ্তরের সংশ্লিষ্ট কর্মকর্তাবৃন্দ উপস্থিত ছিলেন।

সভায় বাজার দর পর্যালোচনাসহ যৌক্তিক মূল্যের বাস্তবায়ন, গত বছর রমজান শুরুর পূর্বের বাজার দরের সাথে বর্তমান বছরের এ সময়ের বাজার দরের পর্যালোচনা, পণ্যের মূল্য/সরবরাহ স্থিতিশীল রাখা, মেট্রিক পদ্ধতির বাস্তবায়ন, বাজার মনিটরিং জোরদারকরণ, প্যাকেটজাত পণ্য বিপণন ব্যবস্থা চালুকরণ, ভেজাল/ক্যামিক্যাল যুক্ত পণ্য বিক্রি রোধ ও বাজার সমিতির তালিকাভুক্তিকরণ বিষয়ে বিস্তারিত আলোচনা করা হয়।

কৃষি বিপণন অধিদপ্তর কৃষিপণ্যের মূল্য সহনীয় পর্যায়ে রাখাসহ উৎপাদক, বিক্রেতা ও ভোক্তা সহায়ক কৃষি বিপণন ব্যবস্থা প্রবর্তনের স্বার্থে নিরলসভাবে কাজ করে যাচ্ছে। আসন্ন পবিত্র রমজান উপলক্ষ্যে পণ্যের মূল্য/সরবরাহ স্থিতিশীল রাখতে বিপণন ব্যয়সহ লভ্যাংশ যোগ করে কৃষি বিপণন অধিদপ্তর কর্তৃক নির্ধারিত যৌক্তিক মূল্যে খুচরা পর্যায়ে ক্রয়-বিক্রয় এবং সরবরাহ স্থিতিশীল রাখতে ব্যবসায়ীদের প্রতি অনুরোধ জানানো হয়।

মহাপরিচালক কৃষি বিপণন অধিদপ্তর সভাকে অবহিত করেন যে, বর্তমানে দেশে কৃষিপণ্য উৎপাদন ও সরবরাহ পরিস্থিতি সন্তোষজনক পর্যায়ে রয়েছে। তাই পবিত্র রমজানে নিত্যপ্রয়োজনীয় পণ্যের সরবরাহে কোন প্রকার ঘাটতি হওয়ার আশংকা নেই। তিনি ভোক্তা সাধারণ যাতে অহেতুক বিচলিত না হয়ে প্রয়োজনের অতিরিক্ত পণ্য ক্রয় হতে বিরত থাকেন সে মর্মে প্রচারণা চালাতে সভায় আগত ব্যবসায়ী প্রতিনিধিবৃন্দকে অনুরোধ জানান। তাছাড়া তিনি জনগনের দুর্ভোগের কথা বিবেচনা করে খাদ্য দ্রব্য ও কৃষিপণ্যের গুণগতমান বজায় রেখে যৌক্তিক ও সহনীয় মূল্যে বিক্রয় করার এবং অধিক মুনাফার পথ পরিহার ও খাদ্য দ্রব্যে ভেজাল মেশানো হতে দূরে থাকার জন্য ব্যবসায়ীদের প্রতি অনুরোধ জানান।

বিস্তারিত আলোচনা শেষে মহাপরিচালক কৃষক ও ভোক্তার স্বার্থ সংরক্ষণসহ আধুনিক বিপণন ব্যবস্থা প্রচলনের স্বার্থে ব্যবসায়ী প্রতিনিধিদেরকে প্রক্রিয়াজাত ও প্যাকেটজাত করে কৃষিপণ্য বিপণন, মেট্রিক পদ্ধতি বাস্তবায়নের পাশাপাশি ওজনে ইলিশ মাছ ও মুরগী বিক্রি এবং অধিদপ্তর কর্তৃক নির্ধারিত যৌক্তিক মূল্যে কৃষিপণ্য বিপণন ও সরবরাহ স্থিতিশীল রাখতে অনুরোধ জানালে ব্যবসায়ীগণ তাতে ঐক্যমত পোষণ করেন।

